

# Kontuola

ANTZUOLA / Egubakoitza / 2004eko martxoaren 26a / 195. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

## Bost proiektu aurkeztu dituzte Jaurlaritzaren Izartu planerako

AINTZANE IRIZAR

Martxoaren 22an, astelehena, bukatzen zen Eusko Jaurlaritzaren Izartu programarako proiektuak aurkezteko epea. Hilaren 17an egin zuten osoko bilkura, proiektu horiek onartzeko. Aste Santua aurretik proiektu horiek jendaurrean aurkeztuko dituzte.

Guztira, bost proiektu aurkeztu dizkio Udalak Eusko Jaurlaritzari, Izartu programarako.

Alde batetik, Uzarragara hartzen den zubitik Lizarraga auzora doan errepidearen proiektua aurkeztu dute. Bestetik, alde zaharreko zorua eta azpiegiturak berri-zeko proiektua aurkeztu dute.

Ibarre auzoa urbanizatzeko proiektua ere Izartu programan sartzeko proposatu du Udalak, batez ere, dagoen aparkaleku faltari irtenbidea emateko. Sagastiko zelaian parke bat egiteko proiektua ere aurkeztu dute. Azkenik, gizarte edo kultura etxearen proiektua dago. Hantxe jarriko dituzte kultur jardueretarako lokalak eta hainbat gizarte zerbitzu. Hori guztia beheko bi solairuetan. Azpian, berriz, garajeak, eta gainean, etxebizitzak. Etxe-



Izartu programara aurkeztutako proiektuetako bat da Ibarre auzoa urbanizatzea.

bizitzetako batzuk Udalak babes-tutakoak izango dira; beste batzuk saldu egingo dituzte, garajeak bezala, irabaziekin, sortzen diren gastuei aurre egin ahal izateko.

Proiektuok sei milioi euroko aurrekontua dute, lau urtean

banatuta; Izartu programaren bitartez, %30 finantzatzea espero du Udalak; beste %30 udal aurrekontuekin, eta gainerakoa, irabaziekin.

Aste Santua aurretik, Udaleko arduradunek jendaurrean aur-

keztuko dituzte proiektuok, urtarrean egin zuten moduan.

Azkenik, aipatzekoa da kiroldegien proiektua Izartu programatik kanpo geratu den arren, Udalak kiroldegia egiteko asmoarekin jarraitzen duela.

## MUSIKA

### Patxi Saizek 'Galdetzen' diskoa aurkeztuko du bihar, zapatua, Herri Eskolako aretoan

Bihar, zapatua, egingo du kontzertua Patxi Saiz kantautoreak. 22:00etan izango da, Herri Eskolako aretoan. Hantxe, *Galdetzen* diskoa aurkeztuko du, bere lehendabiziko diskoa, hain zuzen ere. Aurretik, baina, hainbat maketa eta grabazio txiki argitaratu ditu Patxi.


Jesus Mari Lopetegiren Noiz-behinka estudioan, Zarautzen, grabatu ditu kanfuak Patxi Saiz kantariak. Mikel Markezen laguntza izan du, ekoizpen artistikoan. Bere kantuek nostalgia eta erro-

mantizismoa erakusten dizkigute. Iparraldeko hainbat idazleren hitzei jarri die musika *Galdetzen* diskoan; horrela, Manex Erdozaintzi, Etxahun Iruri eta Elizanbururen hitzak jaso ditu, eta berriro ere, inguru hartako literaturaren garrantzia argi lagatzen du.

**XABIER AGIRREK ERE PARTE HARTU DU** Patxi Saiz getariarra da, baina aspalditik dauka harreman estua Antzuolarekin eta bertako hainbat musikarirekin. Disko honetan, esaterako, Xabier Agirre musika-

ri antzuolarrak parte hartu du. Biharko kontzertuan ere taula gainean ikusiko dugu. Alboka, gaita, baxua eta hainbat txirula jotzen ditu Agirrek; ahotsa ere jartzen du.

Aurretik ere, beste maketa eta grabazio batzuetan, hainbat antzuolarrek lan egin du Patxi Saizekin. Lehendabiziko maketan, esaterako, Patxi Olabarriak, Eli Enak eta Xabier Agirrek parte hartu zuten; bigarren maketan, berriz, Alaitz Zabalok eta Xabier Agirrek berak parte hartu zuten Patxiarekin.



Patxi Saiz kantautorea.

## LABUR

### Karmen Irizar Valladolidera eraman dute

Karmen Irizar presoak Martuteneko espetxetik Valladolidera eraman zuten hilaren 15ean. Domekan izan zuten lehenengo bisita senitartekoei. Bestalde, aipatzekoa da apirilaren 4an dela Karmenen urtebetetzea; Gailur eta Larrea tabernetan postalak jarri dituzte, zoriontzeko.



Karmen, espetxeratu aurretik.

### Txotxongilo emanaldia bihar, zapatua, Olaranen

Txotxongilo Taldearen emanaldia izango dugu bihar, zapatua, Olaranen, 16:00etan. Aldatu egin dituzte Udalaren egitarauan iragarritako tokia eta ordua. *Itsasmin* ikuskitzuna eskainiko dute, txotxongilo, diapositiba, musika eta beste hainbat elementuren laguntzarekin.

### Aitor Larrea hirugarren, Oñatiko duatloian

Aitor Larreak hirugarren egin zuen Oñatiko duatloian. Jon Arozena hondarribiarrak irabazi zuen lasterketa eta Zuhaitz Ezpeleta arrasatearra bigarren sailkatu zen. Zortzi kilometro korrika, 40 bizikletan eta beste lau korrika egin zituzten. Aitorrek 1:46:38ko denbora egin zuen.

# Independentzia Eguna, bihar, zapatua

AINZANE IRIZAR

Bihar, hilak 27, ospatuko dute Independentzia Eguna. Antzuolako Gazte Asanblada arduratu da aurten egun horretako ekitaldiak antolatzeaz. Ekitaldi nagusia herri bazkaria izango da, udal pilotalekuan, 14:00etan. Eguneko ekitaldiak, baina, aurrez hasiko dira: 13:00etan triki poteoa egingo dute, herriko trikitilariekin. 14:00etan, esan bezala,

bazkaria. Bazkalosterako ere hainbat sorpresa antolatu dituzte. 19:00etarako, berriz, herri kirolak antolatu dituzte. Eta gauerdian, azkenik, Trikizio taldearen emanaldia egongo da.

### 374 URTE

Antzuola Bergararik banatu zela, independentzia lortu zuela, 374 bete ziren joan zen abenduaren 12an, eta horixe ospatuko dute zapatuan.



Aurten ere frontoian egingo dute herri bazkaria.



## Juanak 96 urte beteko ditu bihar

Herriko nagusia da Juana Gabilondo; bihar, martxoak 27, hain zuzen ere, beteko ditu 96 urte. Hori dela eta, bere etxean egon gara, argazkia ateratzen eta zoriontzen. Belaunak ez ei dauzka oso ondo, baina, gainerakoan, osasuntsu aurkitu dugu Juana. Urtebetetzea ospatzeko, bazkaria egingo dute Juanak eta bere familia osoak.

Zorionak, bada, Juana, eta urte askotarako, guzti-guztion partetik! /A.I.

## LABUR

### Antzuolarrak ondo Elgetako pilota txapelketan

Xabier Biteri eta Josu Agirre pilotari antzuolarrek Elgetako lau t'erdiko txapelketa jokatzen dihardute. Hain zuzen, aurreko asteburuan jokatu zituzten lehendabiziko partidua, eta biek ere irabazi egin zuten. Agirrek Iribar izan zuen aurrez aurre, eta 22-13 irabazi zion. Xabier Biterik, berriz, San Sebastianen aurka jokatu zuen txapelketako lehendabiziko partidua, eta 22-11 irabazi zuen.

### Trenaren gaineko erakusketarako materiala batzen

Antzuolako trenbidearen eta trenaren gaineko erakusketa antolatzen dihardu Udalak, maiatzerako. Orain, erakusketa horretarako materiala batzen dihardute. Horrela, herritarrei honako eskaera egin nahi diete: norbaitek argazkiak edo bestelako materialik balu, udaletxera, Jone Larrañagarengana edo Iñigo Ramirez de Okarizengana jo dezake.

## HERRITARREN HITZA / Joseba Lezeta · Kazetaria

# Interes komertzialak eta herriko jaiak

Patxi Mutiloa Aspe enpresako buruak garbi esan zuen Buruz buruko Pilota Txapelketa Nagusiaren aurkezpenean, kirol merituz gain, interes komertzialak direla nagusi. Dirudienez, Berraondok ez du interes komertzialik; horregatik geratu da txapelketatik kanpo, nahiz eta iaz lehen mailara igotzeko txartela lortu.

Mandazainek bidean egiten ei dute topo eta Asperi helduko zaio Antzuolara etortzeko eguna, herriko jaietan. Beharbada orduan, Antzuolako herriari pilota jaialdia saltzerakoan, izango du interes komertziala

Berraondok. Orduan, Mutiloari bere berbak ekarri behar ko zaizkio gogora; antzuolarrak interes komertzialik ez bado, jaialdia dekalde emateko eskatu. Dirua eskatzen badute, berriz, ezezkoa eman. Ez da bidezkoa urtean egun bakar batean interes komertziala izatea.

Mikel Goñik zuen, euren ustez, erakarpina Buruz burukoan. Partida bat jokatu, galdu eta



**"Aritz Berraondori ukatu egin diote txapelketan berea zuen aukera"**

etxera joan da. Garesti irten zaie Vidarteri eta Mutiloari apustu hau. Labriteria ez zen jende asko joan eta Berraondok baino dirutza handiagoa irabazten du Goñik. Oinatz Bengoetxeari, Otxandorenari, sei hilabetez min hartuta izan ondoren txapelketa jokatuko duen Esaini, adibidez, lekua egin diete.

Duela hiru urteko Lau t'erdiko Txapelketan bi enpresa

nagusietako pilotaria ez zen Otaegi izan zen ezustekoa. Goñi kanporatu eta haren atzetik joan ziren bere herritarrek. Zegaman lehenik eta Astelenan ondoren, Eugiren kontra jokatu zuenean. Eibarko pilotalekua bete samartu egin zuten azpeitarrek, ezustean. Makina bat partida jokatu dira figurekin orduan baino jende gutxiagoren aurrean. Aurtengo Buruz burukoan ere gauza bera gertatuko da norbaitekin. Behetik datorrenen batek, partidak irabazi ahala, erakarriko du jendea. Berraondori ukatu egin diote berea zuen aukera hori.

## KIROLA

### PARTIDUAK

**FUTBOLA**  
Martxoak 27  
12:00: Antzuola-Union Txiki (2. erreg.)  
Martxoak 28  
12:00: Antzuola-Zestoa (Kadeteak)

**PILOTA**  
Martxoak 27 (Udaberri Saria)  
10:00: Olalde-Urrietako II (Paletaz)

### EMAITZAK

**FUTBOLA**  
Lagun Onak 9 Antzuola 0 (2. erreg.)  
Antzuola 5 Beti Ona 4 (Gazteak)

**PILOTA**  
Udaberri Saria  
Olalde-Zarautz (Kadet. eskuz) ... 22-5  
Oiangui II-Olalde (Paletaz) ... 20-35



*Juan Cruz*  
**Jaunartze argazkiak**

Betiko izango den oroigarriak merezi du lan txukuna.  
Zatoz Juan Cruzera.

Herriko plaza 4. Tel. 943 78 70 66. ANTZUOLA

**MUJIKA HARATEGIA**



**Berezitasunak: Etxean hazitako zekorrek eta oilaskoak**

Kalebarren, 1.  
ANTZUOLA  
Tf. 943 76 64 34

**AITZ-GARBI**



**Pintxoak eta kazuelatxoak. Bazkariak eta afariak**

Kalebarren 15. Tf. 943 78 70 51  
ANTZUOLA

**LARREA**

**TABERNA**

Kalebarren 17  
ANTZUOLA